

東甫遺稿

丙子初春

東甫遺稿

水竹邨人



序

清季山左薦紳有著述稱於世與余相友善者曰鄭東甫比部杲柯鳳孫學士劭恣宋晉之吉士書升孫佩南京卿葆田四君之學皆博究羣籍探其本末欲舉所得發爲文章以餉當世雖各有傳有不傳而東甫所著藟落至此深可慨已東甫生平挈經信道堅苦自勵無日不讀書無日不撰述每一落筆上下今古縱橫排纂推之靡盡而又篤守古訓力闡詭異義有未安展轉徵討窮日夜不休一文之成恒三四易豪有終用初義而定者有反覆塗乙至不可辨識而迄未定者是以屬草多

複而成書實少東甫旣歿余從鳳孫得所爲杜詩鈔印行之桐城馬通伯取其已定之書若干篇編爲東甫遺書合肥李氏刻入集虛草堂叢書者也邇歲余纂清儒學案思舉東甫鳳孫晉之佩南連類書之爲山左諸儒殿顧東甫之學僅據通伯所編烏足以見其全東甫有女爲余姪緒通婦尙藏其父遺藁命之檢示纍纍盈尺盡出手寫重複模糊旣如前所云益以闕文錯簡羈雜無次幾不可讀殆卽通伯所棄置者歟爰屬門人曹子秉章爲之理董擇其完整清晰者重付繕正釐爲四卷東甫之作盡於是矣然象彖文言義疏及讀宋元學案

仍未皆成之篇也緒通婦並言其父初逝鳳孫曾爲檢  
定遺文曰約略可編四十卷審如是則其散佚者多矣  
此區區者九鼎之一爨耳亦烏足以覘東甫之全哉東  
甫平日談經每取益於晉之爲古文辭每取益於佩南  
今余述兩君學案僅采之流傳文集他無所見視東甫  
所傳尤少鳳孫有新元史余爲鋟板通行而其精力所  
萃則在穀梁補注一書卒前數月猶手自點竄又有文  
藁若干卷余皆未之見然其子通敏有才知重父書必  
不至散佚無傳雖然四君者以文章爲性命一字之貽  
精神斯寓正不可以傳書多寡遽衡其沒世之名也故



併述之民國二十四年乙亥孟冬天津徐世昌

東甫遺稿目

卷一

彖象文言傳疏

卷二

讀宋元學案

卷三

春秋復古義

詩春秋伯字義

成康年考

高宗復古說

夏目 地 禾  
論文辭

卷四

致孫佩南書

與孫佩南論詞學書

己丑第一鈔序

己丑山西鄉試進呈錄序

己丑江南鄉試進呈錄後序

漱蘭夫子壽辭

趙太夫人壽辭

陳母熊太夫人六秩壽序



李君墓誌銘

東甫遺稿卷一

卽墨鄭杲東甫著

彖象文言傳疏序

序曰杲幼時讀易每苦舊說歧出無所折中以意求之縱復有理無以見其必合聖人又每讀經文注說旣畢更讀大傳往往義已前盡轉若贅文其後稍識本義之善觀其切合語勢聖人之情乃若可見然又頗疑經傳各明一義之說而於前之兩惑抑仍無由盡解稍長讀御纂周易折中乾彖案語始悟四德占辭只是一義因之究觀六十四彖乃見傳釋經文辭必相應有所引申

義未嘗不一貫也又讀大象傳推其所以分部之故乃見夫子之謙慎知義例不可不嚴因悟後學說易但當疏傳不當越傳而更注經於是頗思有所纂錄顧念傳主明義經文取物往往不詳當時或是共明今已不勝阻奧釋之則嫌於破體不釋則古訓難通牽茲兩端擬議未決又見朱子嘗欲略釋經文而發其所以然於傳之下因歎先賢于此已有規度向之所擬疑其不可復用最後觀魏高貴鄉公問博士之言然後所疑渙然若有所定蓋觀博士之對知當日所論正指鄭本若使分傳隸經已如後世豈容仍曰彖象不連經文用此知易



之卷第鄭君未有所動其曰而注連之者必是注本單  
行釋傳釋經都居一處故令讀者見爲連也如是則舊  
帙無所紛更而經傳自歸一貫卽有釋經之處更無越  
傳之由私幸積年蓄疑一旦而解一隙之得可以不終  
棄矣於是放其義例本用單行首舉傳文第曰自某至  
某小狐畢舉下接天行慎辨旣明乃釋陽在彖象都畢  
繼以文言意謂傳本釋經非自立說傳義旣釋經文自  
宣至於經詳傳略不容無釋之處則用本義切合語勢  
之趣變而通之俾所解說雖有連經要其指歸只是明  
傳未知鄭注連經是否如此要之不敢越傳之初指庶

幾不終負焉規爲之始但期擷取諸家資其成說旣而屬筆則見前人多是解經移以疏傳義雖相通辭多未應於是割取本文不沒所自冠以傳文明其辭之相屬申以蒙案見其義之有徵若夫解說經文似已通曉繩以傳義未見其然概從舍旃無容牽合若夫御纂案語罔敢割裂有所稱引恭錄全文亦綴謹案明夫前聖後聖所以合符又有陳義縱橫文難分隸漢人目爲通論其體昉自繫辭若茲之類另節離居分附篇末亦有蒙案明其所以足徵當其旁攷前聞比經合傳本稽舊訓時獲新知則亦附錄篇中姑備一解以上之等旣取義

通兼求證確疏義或旁涉他書取徵則不出十翼用此  
益知易傳獨是完書自相應合後學說易誠無庸舍爾  
靈龜自踏迷復者矣然而茲編雖是疏體不取辭繁恐  
其引申漸遠語勢迷隔其中括辭約旨未經證明者別  
爲小箋卽埒各篇之後自明已作有如或問之書尋省  
易了則猶鄭君之意仍必歸本傳義以示勿絕其源凡  
茲大端揭諸卷首其餘細例散寓箋中總以見折中夫  
子不敢自破其疏傳而不注經之例云爾六十四篇旣  
完題曰彖象傳疏

第一卷彖傳疏



大哉至咸寧乾彖傳也不釋乾者乾是卦名周以前聖人所定彖正釋此傳但釋傳耳大哉三句本義云釋元義也杲案萬物者坤以下六十三卦也知然者萬物皆乾道所變化六十三卦亦皆乾卦所變故知此萬物正當彼卦也資始之義卽此見矣乃者承上之辭天者物之最始而嚮乎物物無不統乃統天矣所以爲大哉也統者自上而下由始澈終之義雲行二句本義云釋乾之亨也杲案雲雨者天類也道之亨難以言見取天類之亨者以明之也天本類乾故天類之亨者可以類乾之亨猶之地本類坤經則取地類之柔順而健者以類

坤之利貞也又案知雲雨是取類者易爲言道非爲言  
氣化也雲雨只是氣化故知是取類也品物流形者俞  
玉吾云亨則流動形見而洪纖高下各有區別故特曰  
品果案此品字與下文各正性命正相應也大明四句  
言人之法此元亨也大明者乾知大始人法乾元以大  
明爲始也終始者本義云始卽元也終謂貞也果案先  
言終者道之終物之始也故人之明道先明終而後明  
始說卦傳窮理盡性以至於命可徵也六位時成者本  
義云大明乾道之終始則見卦之六位各以時成六龍  
者朱子云只是六爻果案初二三四五上位也九六爻

也繫辭傳言爻與位者可徵也爻言乎變龍善變者也  
位以時成爻言乎變時乘之義卽此見矣又案凡卦六  
位皆有六爻人皆乘之時乘六龍六十四卦之通例也  
六位時成亦言凡卦之六位也所以然者凡卦皆資始  
於乾故明乎乾道之終始則凡卦舉統於其內也以御  
天者猶屈平言周流乎天也乾道統天無所不在故人  
能隨時乘之則用以周流乎天無往而不亨也統天御  
天二天字程子所謂以形體謂之天者也知然者道一  
而已乾旣是道所統者不容更又是道乘龍卽是乘道  
不容云乘道以御道也故知只是以形體言之也乾道